

Oni bi, kao nešto, da investiraju, a mi im, kao nešto, (ne) nudimo....

Mjesecima i danima bombardirani smo jadikovkama zvaničnika, biznismena, raznoraznih eksperata i medija kako nas, eto, ozbiljne investicije i investitori zaobilaze (godinama). I nekako svi, kao uzgred, spomenu kako, eto, investicije odoše komšijama, a mi opet ostajemo na sadaki (naravno, rijetko se ili nikako ne spomene uloženi rad države i njenih institucija u smislu promptnog donošenja zakona koji će stvoriti ono što se zove povoljniji privredni ambijent za investitore).

Nedavno sam razgovarala sa osobom koja je imala priliku prisustvovati sastanku sa onima koje mediji zovu "potencijalnim investitorima". Detalj toga razgovora koji mi se urezao u sjećanje bilo je pitanje "potencijalnog investitora" jednom članu bh. delegacije kada se može napraviti studija izvodljivosti za projekat koji nudi BiH i njegovo neskriveno oduševljenje kada mu je odgovoreno da studija već postoji. Da se razumijemo, radi se o investitorima o čijim ulaganjima mjerenim stotinama miliona (petro)dolara slušamo već decenijama????

Drugi detalj je priznanje člana bh. delegacije sa popriličnim iskustvom u ovim poslovima da se u posljednjih godinu i po dana uradilo više konkretnih stvari sa ovim "potencijalnim investitorima" nego u prethodnih 20 godina????

Dakle, kada poslovičnoj aljkavosti i lijenosti dodate zakonski okvir koji imamo, sveprisutnu bahatost, u medijima i svekolikim narodnim masama uvriježeno mišljenje da su strani vlasnici firmi izrabljivači, robovlasnici (jer tjeraju ljude da rade "punih" osam sati, imaju razrađen sistem nagrađivanja i kažnjavanja itd.), inspekcija koje sa naročitim apetitom pohode njihove pogone, sudova koji po tri godine ne upisuju vlasništvo - ne treba čuditi činjenica što je nivo investicija u BiH posljednjih nekoliko godina u slobodnom padu.

U najkraćem, dozvolite da parafraziram onog vojnika JNA početkom desetodnevnog rata u Sloveniji, "oni bi, kao nešto, da investiraju, a mi im, kao nešto, (ne) damo..."

p.s. Ovih dana nas bombardiraju najavama da ovaj ili onaj "najbogatiji" investitor na svijetu dolazi na *Sarajevo Business Forum*. Dobrodošli, ali bih umjesto štire najave da ljudi dolaze i koliko novaca imaju jako voljela pročitati i koje ćemo projekte ponuditi npr. vlasniku *Manchester Citya*. **B**

Aida Delić,
glavna i odgovorna urednica